

Weckherlin, Georg Rodolf: Ode (1641)

- 1 Wje vnverhinderlich ein Jahr
- 2 Schnell nach dem andern dahin fliehet!
- 3 Wie vnempfindlich vnser haar
- 4 Sich graw zu färben nicht verziehet!
- 5 Vmbsunst die Frombkeit selbs/ die stirn
- 6 Von rüntzeln/ vnd von sorg das hirn
- 7 Zu freyhen sich bemühet.

- 8 Lauff alle tag der Kirchen zu/
- 9 Vnd dien dem/ der allein Allmächtig;
- 10 Vnd ohn erquickung/ nahrung/ ruh/
- 11 Erweiß dich tag vnd nacht andächtig
- 12 Vnd Christlich: So wirt endlich doch
- 13 Das vnvermeidenliche Joch
- 14 Des Todts auch durch dich prächtig.

- 15 Die sünd/ die alle menschen gleich
- 16 Gemachet/ machet sie fortgehen/
- 17 Vnd lasset weder arm noch reich
- 18 Sich länger spreissen vnd stillstehen:
- 19 Ein Juncker/ Herr/ Graff vnd Monarch
- 20 Wirt wie ein baur mit einem sarch
- 21 Vnd einem grab versehen.

- 22 Vmbsunst der forchtsam für ein weil
- 23 Dem Meer/ dem Krieg/ der Pest entfliehet/
- 24 Dan ja der Tod/ der dan in eyl/
- 25 Dan langsam ist/ nicht lang verziehet:
- 26 Gleich ist jhm der klein vnd der groß/
- 27 Vnd der gewafnet vnd der bloß/
- 28 Der welck/ vnd der noch blühet.

- 29 Vmbsunst sich setzet vngedult

30 Forcht vnd geheul dem Tod entgegen:
31 Es muß ein jeder dise schuld
32 Auff die bestimpte zeit ablösen:
33 Nichts kan den Tod/ vnser geschlecht
34 (von staub vnd aschen ein gemächt)
35 Zu sparen je bewögen.

36 Da müssen wir dan alles gut
37 So wir begehret vnd erfassen/
38 Was vns mit hochmuht vnd vnmuht
39 Jemahls zu lieben vnd zu hassen
40 Beliebet/ mit dem lieben leib/
41 Hauß/ hoff/ spil/ kurtzweil/ kinder/ weib/
42 Vnd freind dahinden lassen.

43 Hat einer (nichts mehr dan gestanck)
44 Verlassend alles dan beschlossen/
45 Erfolget dafür schlechter danck
46 Vermischet mit spot/ schmach vnd bossen;
47 Wan Er errungen vil alhie
48 Für andre leut mit sorg vnd müh/
49 Vnd (Narr) selbs nicht genossen.

(Textopus: Ode. Abgerufen am 23.01.2026 von <https://www.textopus.de/poems/19000>)